

周禮政要

關中叢書

周禮政要

邵力子署

敘

中國變法之議權輿於甲午而極盛於戊戌蓋倭變而中阻政法未更而中西新故之辯舛馳異趣已不勝其譁聒夫政之至精者必協於羣理之公而通於萬事之變一切弗講而徒以中西新故畫區畛以自隘吾知其懵然一無所識也中國開化四千年而文明之盛莫尙於周故周禮一經政法之精詳與今泰東西諸國所以致富彊者若合符契然則華盛頓拿坡崙盧梭斯密亞丹之倫所經營而講貫今人所指爲西政之最新者吾二千年前之舊政已發其端吾政教不修失其故步而薦紳先生咸茫昧而莫

知其原是亦綴學者之恥也辛丑夏天子眷念時艱重議更法友人以余嘗治周禮屬摺撫其與西政合者甄緝之以備財擇此非欲標揭古經以自張其虛憍而飾其竊敗也夫亦明中西新故之無異軌俾迂固之士廢然自反無所騰其喙焉余書凡二卷都四十篇雖疏漏尙衆而大致略具漢儒不云乎爲治不在多言顧力行何如耳誠更張今法集吾羣力而行之不疑則此四十篇者以致富彊而有餘其不能也則雖人懷鼂賈之策戶誦杜馬之書其於淪胥之痛庸有救於豪標乎嗚呼世之論治者可以鑒矣

光緒壬寅四月籀頤居士書

周禮政要目錄

卷一

朝儀 坐論

冗官 兼職 減員 裁缺

重祿

達情 臣民言事

宮政 內務府隸戶部

奄寺 革內監

吏胥 革書吏差役

鄉吏 鄉董

教胄官學堂 王公遊歷

卷二

廣學學堂

通藝算學 光重化電

選舉薦舉 徵辟

博議書院

廣報報館

通譯譯書 言語文字

觀新憑單 博物院 博覽會

治兵民兵

巡察 警察

卷三

圖表

會計 豫算決算

戶版

口稅

塵布 市肆房屋稅

券稅 印花稅

金布 金銀圓

券幣 鈔票

漁征

度量

礦政

卷四

冶金 鍊金銀 鍊鋼

水利 治河

教農

樹藝 園圃 木材

保商

同貨 公司 商會

攷工

攷醫

獄訟

訟費

陪訊

諭刑

西律

收教

警情

教游

教疾

周禮政要卷一

瑞安孫詒讓著

朝儀

大祝辨九擯一曰稽首二曰頓首三曰空首四曰振動五曰吉擯六曰凶擯七曰奇擯八曰褒擯九曰肅擯以享右祭祀注云一拜答臣下拜再拜拜神與尸

司士正朝儀之位辨其貴賤之等王南向三公北面東上孤東面北上卿大夫西面北上王族故士虎士在路門之右南面東上大僕大右大僕從者在路門之左南面西上司士擯孤卿特揖大夫以其等旅揖士旁三揖王還揖門

左揖門右大僕前王入內朝皆退注云此王日視朝事於路門外之位司士擯詔王出揖公卿大夫以下朝者特揖一一揖之旅衆也大夫爵同者衆揖之公及孤卿大夫始入門右皆北面東上王揖之乃就位羣士及故士大僕之屬發在其位羣士位東面王西南鄉而揖之三揖者士有上中下王揖之皆逡遁既復位鄭司農云卿大夫士皆君之所揖禮春秋傳所謂三揖在下

司儀詔王儀南鄉見諸侯士揖庶姓時揖異姓天揖同姓注云土揖推手小下之也時揖平推手也天揖推手小舉之王燕則諸侯毛注云謂之須髮坐也

考工記總敘坐而論道謂之王公注云天子諸侯

謹案古常朝之儀有立有坐而無跪有揖而無拜今則有拜跪而無坐揖此其異也蓋周制王與諸侯皆三朝
皐門內三詢之外朝不常視常視者唯路門外之正朝
其內則路寢庭爲內朝王日視正朝但立見羣臣揖之
而已王揖畢入適路寢聽政則有坐議之事皆無所謂
拜跪也內朝有坐曲禮說士云朝不坐鄭注謂大夫坐
於上士立於下則凡臣侍於君自大夫以上皆坐不徒
三公矣燕禮則君與賓及卿大夫皆脫屨而坐其賓與
卿大夫拜則君答之蓋禮尤略而情彌摯矣漢以後君

臣之分益嚴然亦不廢坐禮賈誼宣室之對孝文爲之前席坐之徵也古禮凌夷堂廉隔闕拜跪之節益繁則臣無坐論而君有坐受孔子不云乎君使臣以禮夫臣跪而君坐於禮已微有未協而況後世之坐又非古之禮坐乎蓋禮坐乃以兩膝著席以尻著踵而坐其與跪止有安危之異耳今之坐以尻著座則是箕踞矣二者敬倨絕異古者臣再拜稽首君尙以空首一拜答之安有臣拜跪而箕踞以受之者哉夫天澤之分古今不易本不藉以僕僕亟拜爲恭而以天子敬禮師保老臣亦必責其以筋骨爲禮天威所懾情誼不通而求其從容

論諫直言無隱蓋亦難矣西國崇信基督唯入堂禮拜有跪禮此外臣見君子見親亦無拜跪其禮與中國古禮雖不同然其簡而易行則一也西人來中國不習拜跪故各商埠租界華洋之訟華人跪而洋人立已爲失禮況其公使覲見往往以議禮齟齬乾隆十八年嘉慶二十一年英使兩次入覲均以不能行禮被申飭彼時我國勢方盛猶不能強彼相從而況於今乎前者德主之弟亨利入覲要索坐禮華人駭爲未見實則彼國臣民及外國公使見君得坐論不以爲異我以為非常之異數彼實以爲禮賓之恆儀也此次款議彼使卽有更

定覲見禮節之請竊謂將來必有更改何如明降諭旨
援據古禮每日常朝易拜爲揖議政之頃則一律賜坐
紆尊達情旣以新普天之耳目而霽威崇禮亦不嫌外
侮之要求幾餘清暇親臨燕坐進天下魁傑之士俾咸
得竭忠盡智造膝敷陳以論安危之大計亦曠代之盛
舉也朝儀旣更則凡官吏之聽民訟亦令盡去拜跪之
禮而民情無不上通矣因時審勢通變化裁拜跪之繁
文縟節似有不能不變革者禮莫大於因時義或在斯
乎

冗官

天官序官設官分職以爲民極注鄭司農云置冢宰司徒宗伯司馬司寇司空各有所職而百事舉

大宰乃施法于官府而建其正立其貳設其攷陳其殷置其輔注云正謂冢宰司徒宗伯司馬司寇司空也貳謂小宰小司徒小宗伯小司馬小司寇小司空也考成也佐成事者謂宰夫鄉師肆師軍司馬士師也殷衆也謂衆士也輔府史庶人在官者

稿人掌其內外朝冗食者之食注云冗食者留治文書若今尙書之屬諸直上者

謹案周六官三百六十職各有職掌鄭注所謂各有所職而百事舉也故有冗食無冗官冗食者如常職而以更直食於公者也後世設官猥多而事之舉者轉少故冗官之弊興而今爲尤甚周制以冢宰總百官閱廣如六典崇重如八柄繁雜如九式以一人掌之而不疑漢晉之盛丞相亦多止一人而今則大學士四人協辦二人員數已多雍正閒設軍機大臣而內閣止主票籤於軍國大事不得與聞則宰相爲冗員矣周禮六官之長各官止一人而今則六部尙書皆二人侍郎以下視周之貳攷員數皆倍蓰而禮部之外又有太常寺鴻臚寺